

DAMAS Y CABAYEROS.
BON NOCHI.

Dia cu Rudy a bin cas pidi mi pa bisa algo di su buki el a cohe mi fo'I base,
manera nos ta bisa den beisbol.

Di con?

Den pasado e persona aki tabata p'ami Pader- Pader Lampe.

Y awendia el a bira Rudy, Rudy sec!

Nos ta kere cu e tabata un cambio chikito, ma esei no ta e caso.

Un cambio masha profundo mes.

E no tabata abrupt.

Lesando su buki mi a bin compronde cu e tabata uno dificl y profundo.

E dos palabranan aki - dificl, y profundo a inspira mi pa complace cu Pader
Lampe cu a bira Rudy.

Y e pensamentonan aki cu mi a pone riba papel mi kier a comparti cu boso.

Pasobra e cambio di pader pa Rudy no a bai di e facil ei manera hopi ta
kere.

Mi Ta Djis Cumpli Cu Mi Deber

Ernesto E. Rosenstand

Den e buki aki dr. Armando Rudy Lampe ta splica su motivacion cu a conducie pa cambia sacerdocio pa politica. Hopi hende lo pensa: Un decision straño. Hopi di nos ta puntra con bin un sacerdote ta bira politico. Algo cu nos ta mirando mas y mas delaster tempo. E aña aki mes nos a experencia cu un Obispo, monseigneur Lugo, ta drenta politica y bira president di Paraguay. No solamente sacerdote, ma ministro di otro religion tambe ta haciendo esaki.

Na Merca un domi a core campaña pa bira candidato di un partido pa despues por core campaña pa presidencia di e pais. Nos lo puntra:

- Kico ta move e hendenan aki pa tuma e paso aki? Ami ta kere cu esei ta sinta den e echo cu hende kier ta liber pa scoge loke cu e kier.

- E filosofo Frances Jean Paul Sartre a bis'e asina bunita:

- Hende ta condena pa ta liber.

- Y ta e libertad ei ta pone nos haci escogencia den bida. Y p'esei un sacerdote ta scoge pa bira politico.

- E otro motibo ta e compromiso social cu e tin cu su pueblo. E no tin solamente un compromiso religioso, ma tambe uno social. E mester predica keto bai; husticia social. No ta facil haci esaki. Den curso di historia a keda demostra cu no ta tur ora e scogencia aki a sosode y si el a sosode e no a duna resultado.

- Nos ta kere cu sacerdocio y politica ta dos cos completamente diferente. Nan no por bai hunto. Ma si nos profundisa nos mas den analisa e diferencia nos ta haya cu esaki ta hopi chikito. Naturalmente riba tereno mundano. Pueblo tabatin algo di bisa den nan nombramento.

Continuamente pueblo ta reza pa haya su propio sacerdote. Sacerdote cu ta sali for di

e seno di e comunidad. Nan lo compronde miho necesidadnan di e pueblo Y Dios ta yama. E ta bira sacerdote. Pues indirectamente nos ta scoge Y awor laga nos mira politicamente.

Den eleccionnan directamente nos ta scoge un politico cu nos ta kere y spera cu lo e compronde miho e necesidadnan di e pueblo. Y nos ta pone directamente pa representa nos.

Su sentimento social hopi biaha ta hunga un papel importante den e preferencia di e pueblo.

Nos no mester lubida cu Iglesia tin un compromiso social cu e pueblo. Ya esei Cristo a siña nos ora cu el a cura tur e hende malo cu nan a trece p'e. Y den algun caso el a duna multitud grandi di hende come ora esei tabata necesario. Y p'esei for di cuminsamento di Iglesia socialmente e ta hungando un papel importantisimo den e pueblonan. Principalmente den e paisnan tercermundista.

Y si den curso di tempo un sacerdote ripara cu miho e bira politico pa purba trece cambio den situacion di su pueblo ta un decision liber cu nos mester respeta. E ta liber ta haci esaki. Ma e ta keda un decision dificil. Historia a demostra cu no ta tur hende ta tuma e decision aki y esun cu tum'e no ta mira su resultado positivo.

Tres ehempel:

- Diadomingo di Rama Hesus a saborea un tiki kico por nifica poder terenal. Pues indirectamente hay'E confronta cu politica. Bira rei... bisti un corona ... goberna.

Y ora cu el a tende e multitud kier proclam'E rei... gobernante, masha hopi pensamiento a cruza den su cabes. Na e momentonan ei – bisa modernamente – e por a dal un golpi di estado y bira, gobernante, politico. Ya e

tabatin ministro y coordinador den su cercania.

Na e momentonan ei el a scoge pa ta “sacerdote”. Na e momentonan el a prefera e Cruz riba e Corona.

- Otro ehempel ta e pader Colombiano Camilo Torres, un hoben inteligente cu tabatin un futuro briyante su dilanti. El a bira sacerdote pa purba trece cambio, ma como sacerdote el a ripara cu ta hopi dificil trece cambio social den e sistema politico di e pais.

- Mas despues el a ripara cu como sacerdote e no por a logra mucho. E no a drenta politica, pasobra el a kere cu esei tampoco lo yuda pa trece e cambionan cu su pueblo tabatin mester.

- Y ora cu el a ripara cu aki tampoco por bin cambio.


- Anto el a dicidi di braza gueriya pa for di ei combati inhusticia na e pais. Den esaki tampoco el a logra y mester a paga caro. Nan a mat'e sin logra e resultado cu e tabata anhela asina tanto.

- Y delaster ehempel ta e sacerdote Haitiano Aristide. Pueblo Haitiano a mir'e como e salvador di e pueblo.

- El a drenta politica bai eleccion y bira president di e pais. Pueblo contento a keda spera e cambionan priminti. Lo bin cambio y luga di a trece cambio, politica a cambie

Ehempelnan cu ta demostra con dificil tal decision por ta. Ma mi ta kere cu bal la pena purba, si en berdad bo ta di bon voluntad.

Mescos cu sacerdocio ta un yamada politica tambe mester ta. Tur dos nan meta ta yuda e pueblo for di unda nan mes a sali. Trece cambionan social positivo Y unda no tin husticia purba implement'e. Pues un sacerdote y un politico mester tin e mes un meta su dilanti. Adelanto di su pueblo Felicidad pa su hendenan. Ma den hopi caso tin diferencia grandi entre e sacerdote y e politico.



Ora un hende acerca un sacerdote pa yud'e den su necesidadnan e sacerdote ta mira den dje su prohimo. E ta mira den dje Hesus mes. Hesus, cu ora nan a bis'E cu nunca nan a mir'E pa por a yud'E a bisa:

“ Mi ta sigura boso tur cos cu boso a hasi pa un di e rumannan di menos importancia aki di Mi, boso a hacie pa Mi. (Mt, 25, 34-40)

Mientras cu ora bo acerca un politico hopi biaha e no ta mira su dilanti e prohimo cu mester ayudo, ma e colo, e colo politico. Y si e colonan aki no ta match cu otro anto tin problema. Naturalmente cu esei no mester ta asina.

Un sacerdote y un politico t'ei pa yuda, pa sirbi lo mas tanto cu e por e comunidad cu a pone ei. Y ora un sacerdote bira politico ta un tarea dificil e ta pone riba su lomba.

E kier trece cambio saliendo for di su conviccion, anto e ta topa su dilanti murayanan halto y fuerte cu e mester enfrenta prome cu e por cuminsa cosecha frutanan di su esfuerzonan.

Hopi biaha e pueblo no por o no kier compronde con e sacerdote a bira politico y ta bira lomba p'e. Anto e

ora nan ta mir'e como un Don Quishot cu kier bringa contra mulinanan di biento. Nan ta catalogue como controversial, ma esei no ta di e grave ei.

Den historia moderno nos conoce hopi di e personanan aki cu a haya e titulo ei.

Un di nan tabata moseigneur Don Camara di Brasil. El a yega di bisa:

- Ora bo duna hende cu hamber di come, bo ta un santo.

- Ora bo puntra y investiga di con e tin hamber, bo ta comunista.

- Y den deporte hopi tempo pasa e manager di Brooklyn Dodgers, Leo Durocher semper tabatin confrontacionnan fuerte cu e umpirenan Dia nan a puntr'e ta di con e ta asina dicifil el a contest'e:

- Good guys never win!

Y mi ta kere cu mayoria den e sala aki ta desea pa e “ good guy “ di e buki aki gana, y logra hunto cu su otro coleganan cu pueblo a pone pa represent'e e metanan cu el a stipula pa por logra bienestar di e pueblo aki cu nos tur ta stima asina tanto. Anto e ora nos por bisa: Good guys always win!